



UKA 2017/104  
27. sept. 2017  
Bendt B. Kristiansen

### **Piginneqatigiilluni inissiat pillugit Inatsisartut inatsisaat nr. XX,XX XXX 2017-meersoq.**

(Kommuninut, Nunaqarfinnut, Isorliunerusunut, Attaveqaaqatigiinnermut Ineqarnermullu Naalakkersuisoq)

Inatsisartut upernaakkut ataatsimiinneranni Inuit Ataqatigiinnit siunnersuuteqarpugut nunatsinni isorliunerusuni pisortanit tapiiffigineqartumik aningaasanik attartortitsisarfiit aqqutigalugit namminerisarmik illuliorsinnaanerni periarfissat annertusarneqassasut. Taamaattumik nuannaarutingaarput Naalakkersuisut piginneqatigiilluni inissialiordermi inatsisissamik siunnersuuteqarmata, isorliunerusunut illoqarfinnullu minnerusunut periarfissanik oqilisaataasussamik.

Inatsisissami periafissaatinneqarpoq pisortat inissiaataat pioreersut piginneqatigiilluni inissiaatigilerneqarsinnaanerannut, tamannattaq periarfissaq naammagisimaarnarpoq assinguvorlu attartortumit piginnittumut periutsimut.

Namminerisamik illoqalerneq inissiaateqalernerluunniit aningaasaqarnikkut kiffaangissuseqarnerunermik pilersitsisarpoq, ukiullu ingerlanerini illup nalingata akileriartornerani nalilimmik pingisaqaleriartornermik kinguneqartarpoq siunissamut ileqqaarutitut taaneqarsinnaasumik.

Minnerunngittumik iluarisimaarparput allaffissornikkut marloqiusamik sullissinerup annikillisinnaannik siunnersuut imaqarmat, tassalu qinnuteqartut siusinnerusukkat kommunimut aammalu Namminersorlutik Oqartussanut immikkut qinnuteqartarneringaluat piffimmut ataatsimut inissinniarneqarmat, kommuninut. Tassa kommunit kattussuunneqarneranni siunertat ilaat, allaffissornikillisaaneq. Naatsorsuutigissuarput sullissineq assigiinnerusumik ingerlanneqalerumaartoq, sukkanerusumillu.

Siunnersuutip tusarniutigineqarnerani akissuteqaataasimasut eqqarsaatigalugit pissusissamisuusooq siunnersuutip aappassaaneeraneqannginnaranni ataatsimiitaliamut susassaqartumut misissoqqissaarneqartussanngorlugu ingerlanneqassappat.

Assersuutitut GrønlandsBanken akissuteqaammi oqariartorpoq Nuuk eqqarsaatigalugu tapiissuteqarsinnaanerup maanna 50%-mi inissisimasup at-

tatiinnarneqarnissaa, peqqutigalugu nuummi akiliisinnaassuseqarnermut 50% naapertuummat. Ilaatigullu aamma ersarinnerusumik qulaajarneqartariaqarpoq isorliunerusuni illunik tuniniaanermi akit appasittumik inissisimaffiini, pingaartumillu nunaqarfinni, qanoq ililluni pisortanut illumut qularnaveeqqut qularnaarniarneqassanersoq, assersuutitut akiliisinnaajunnaartoqaratarsinnaanis-  
saanut.